

## COLUMNA

# Il tighers rumantschs

SILVANA DERUNGS

Il Rumantschs èn sco il tighers: morts or.

En vista a l'exposiziun cun il titel da lavur «Rumantsch è biodivers» en la Chasa dal chantuns a Berna vali la paina da dar in sguard sin il pleds da quest motto. Perquai ch'el ha raschun, il purtader da l'exposiziun, cusseglier guvernativ *Christian Rathgeb*: la diversità culturala ha da far a moda detg concreta cun la diversità biologica. Tgi vess p.ex. pensà ch'il rumantsch saja cumparegliabel cun il tigher?

Avant var 100 onns sa cumponiva la spezia da «*Panthera tigris*» anc da 100 000 exemplars, reparitids sin nov sutspezias per las vastadads da l'Asia enturn. Oz existan anc tschintg sutspezias che dumbran totalmain stgars 4000 exemplars. Da quels n'è gnanc in terz femellas fertilas. Funcziunalmain è il tigher mort or. Vul dir: I dat bain anc in pèr exemplars, però de facto n'è la populaziun betg abla da survivor or dad atgna forza.

En Svizra datti ca. 60 000 exemplars dal «*Homo rumantschensis*», en il Grischun var 40 000, repartids sin tschintg sutspezias da differenta grondezza, tschertinas en privel da svanir cun la proxima generaziun.



La lingua rumantscha na para betg da pudair survivor be cun la forza dals individis che la discurren. Sco il tigher dependa er il rumantsch da la bainvulientscha (politica) dad ina spezia (apparentamain) superiura. Il tigher na vegn probabel betg a svanir cumplettamain, mabain ad exister vinavant en zoos e reservats. El è uschia daventà in mitos or da las paraulas (l'Uorsin lascha salidar), in giat predatur senza morsa (tut il pli anc per rivalitads internas entaifer il claus), degenerà al giat charin da reclama (exempels rumantschs à gogo). El n'agescha betg pli en ses abitadi natiral ch'è destrui ubain fragmentà talmain ch'ils individis na s'inscuntran betg pli. Empè da viver en in vast ambient (sur culms e vallas, en barat almain sporadic cun auters individis), sa mova el en in territori limità e cunfinà. Il tigher.

U è il congual cun in animal uschè roial bravamain arrogant? Sin la pagina dal chantun Grischun statti

bain che la Svizra saja «pli multifara, pli interessanta e pli colorada grazia a la lingua la pli veglia anc discurrenda en il pajais». Ma il tigher è tuttina il retg da la dschungla! L'animal emblematic per dignità, forza e selvadiadad! El sa chatta a la testa da la chadaina da nutriment! Ma tgi è en ina tala chadaina sut il rumantsch? Gnanc il gualser pli. Per cumparegliar fissi probablamain d'ans servir dad in'austra spezia. Co fissi forsa cun la simpla lieur brina? U in animal invertebral, sco la lindorna da postigliun u l'echiura? (Be googlai ina giada «Igelwurm»!) Ma cler, quai na fiss betg uschè prestigius. Sche schon murir, lura cun classa! Sco il tigher.

Anc n'èsi dentant betg a fin. La finala semna Rathgeb speranza cun ses invit per «Rumantsch è biodivers». Ma be cun speranzas e luschezzas (memia grondas) na cuntansch'ins betg exnum la generaziun (re)productiva. Cun classa magari anc. Almain ina differenza dessi en la parallela tranter tighers e Rumantschs: Il umans (rumantschs) han – u pudessan avoir – ina schientscha per lur situaziun.

Per quella dal tigher er. Mo per cas.

Silvana Derungs è redactura dal DRG a Cuira. Las infurmaziuns davart il tighers na stattan però betg en il DRG, mabain en «*Das Ende der Evolution. Der Mensch und die Vernichtung der Arten*» dal zoolog tudestg Matthias Glaubrecht.